

## **Gemeinnütziger Frauenverein Aarberg Jahresbericht 2025**

Vouer Motivation simer ir nöie Bsetzung vom Vorstand gstartet.  
Scho ar erschte Sitzig heimer gspührt das mir zäme viu chöi erreiche.

Da aui so engagiert u sehr hiufsbereit si gsi, heimer nume 3 Sitzige brucht für  
aues z'bespräche u ds'organisiere.

Es jedes het si Ufgab gha u die mit Bravour erfüllt!  
Merci viumau liebi Froue, so isches schön zäme d'schaffe!

## **Mir hei es par «Highlights» dörfe erläbe im 2025**

### **Maibummel**

Da simer i Burgerwald gange u hei aus Bericherig der Edi Reusser «Förschter»  
bimene sehr interessante Rundgang dörfe begleite. Während desse hei d'Froue  
vom Vorstand gfüüret so das mir bi Bratwurscht u Brot no gmüetlech  
zämehöcklet si u dä schön Abe hei la usklinge.  
Merci de Froue wo hei mitghulfe!

### **Vereinsreis**

Bsuech ir Seifefabrik Welschenrohr e voue Erfolg!  
Mo mou da heimer Iblick bercho vo natürlicher Körperwösch u Reinigungspfleg.  
Gschtuhnet heimer über dä Vortrag vom nümme ganz eso junge Redner.  
Nachemne feine Mittagässe simer mit em Car witer Richtung Sikypark, womer  
aui die Tier wo süsch kes Plätzli meh hätte, dörfe bewundere u bir Fütterig  
zueluege.  
Nachemne Gläceli, wo mir vor Ort gnosse hei, simer de langsam mit em Car  
wieder heizue gfahre.  
Merci Mägi fürs organisiere!

### **Sommerfescht Brocki**

Bi grosser Hitz hei die Froue dä Alass gmeischeret. Kafi, Chueche u diversese  
Gebäck isch im Angebot gsi. Natürlech isch derzue Brocki offe gsi .Es het  
bestimmt wieder schöni Begägnige gäh bi denä vilne Bsuecher.  
Bravo u merci!

## **Herbschtbummel**

Bsuech ir Sideroupezucht

Ds'Wätter hets nid so guet gmeint mit üs, drum heimer die Führig i umgekehrter Form dörfe erläbe.

Zersch dusse u aui Info was di Röipeli so aus Nahrig berchöme.

När e beidruckende Film ungerem Dach vom Burehus chönne luege u bestune!

Derwile isch dusse es Gwitter düre, aber mir si ja bir Familie Friedrich am Schärme gsi.

Achliessend heimer no e feine Imbiss gnosse. Es isch du chli früsch worde im Schopf, drum isches de ou nid so spät worde.

Danke aune wo hei chönne derbi si.

## **Stedtlilouf**

Wie jedes Jahr het dr'Froueverein e Stand gha wo Kafi, Cakes u Tübeli verchouft si worde.

E grosse Erfolg! Danke Angi u Daniela für dä gross Isatz!

## **Pousemilchtag**

Erika Peter und Annelise Peter si die Milch ga usschänke. Da es im Momänt nur no im Sekundarschuelhus erwünscht isch, heimer das guet Zwöit chönne mache.

Merci Erika für d'Organisation!

## **Zibelemärit**

Brocki isch offe gsi u die flissige Froue hei guet gschaffet!

Bravo u es grosses « Merci » !

## **Mystischi Nacht**

Was versteit me da drunger heimer üs ar Sitzig gfragt, da mir zur Mithiuf si agfragt worde vom Kulturverein Aarberg.

Doch gli isch vor Priska die Idee cho e Verchoufswage z'organisiere.

Dört heimer Kafi Baileys, Tee u Gebäck verchouft.

Merci aune Bäckerinne u Häuferinne es isch e glungne Alass gsi trotz ar Chäuti!

## **Chlousemärit**

### **Samschtig**

Am Morge Stand irichte. Motivation isch sehr gross gsi für dä traditionell Märit u mir hei 40 Jahr Öpfuchüechli chönne fire.

Sandra het e wunderscnöni Dekoration härezouberet.  
Härzliche Dank!

U de isches los gange mit em Verchouf vo Guetzli,Cakes,Tübeli, Kafi, Tee u alkoholfreiem Punsch  
Gschänkli us der Brocki wie z.Bsp. Tassli gfüllt mit Schöggeli, liebevoll ipackt u schön präsentiert.  
Bravo dene flissige Froue!

### **Sunntig**

#### **Öpfuchüechlitag**

Wie jedes Jahr heimer bi Bürgi's ir Wärchstatt dörfe si. Dört hei liebi Froue flissig grüschtet u teiget, so dass die Friteusene am Stand hei chönne ufgheizt wärde.  
Scho gli hets fein afa schmöcke ...

Aui zäme hei ghulfe dases trotz däm schlächte Wätter e glungne Alass isch gsi.  
Bi däm Rägewätter gueti Lune z'bhaute isch nid säubverständlech.  
Erika u Annelise si dankbar das aues so guet u ribigslos isch gange.  
Merci viumau a aui Häuferinne!

## **Gschänk**

Natürlech heimer ou die dankbari Ufgab wahr gnoh für Gschänkli z'veteile.  
Sigs ade Geburtstäg, Wiehnachte oder zum «Gedenk des Trostes».

Äs isch öppis bsungers weme die freudige Ouge darf gseh.

A dere stell ar Gemeinde es härzleches Dankeschön für d'Ungerstützig!

E grosse Dank aune wo bim verteile hei mitgmacht!